



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/149/2025

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

6 հունիսի 2025թ.

Կոռուպցիայի կանխարգելման հանձնաժողովը, կազմով՝ Մարիամ Գալստյանի (նիստը նախագահող), Արամայիս Փաշինյանի, Արմեն Մարությանի և Լիլիթ Ալեքսանյանի (այսուհետ՝ Հանձնաժողով) 2025 թվականի հունիսի 6-ին, քննության առնելով «Հայաստանի Աշխատավորական Սոցիալիստական» կուսակցության (այսուհետ՝ Կուսակցություն) նախագահ՝ Մովսես Շահվերդյան նկատմամբ Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 189.10-րդ հոդվածով նախատեսված զանցանքի հատկանիշներով առերևույթ վարչական իրավախախտման վերաբերյալ թիվ ՎԻՎ/149/2025 գործը՝

Պ Ա Ր Զ Ե Ց

I. Վարչական իրավախախտումների վերաբերյալ գործի վարույթի նախապատմությունը

1.1 Հանձնաժողովը, «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 3-րդ և 4-րդ կետով սահմանված Հանձնաժողովի լիազորությունների շրջանակներում, «Կուսակցությունների մասին» սահմանադրական օրենքի (այսուհետ Սահմանադրական օրենք) 28.1-ին հոդվածի 1-ին, 2-րդ 4-րդ մասերով սահմանված պահանջների պահպանվածության ստուգման արդյունքում հայտնաբերել է, որ Կուսակցությունն իր ղեկավար մարմնում հայտարարատու պաշտոնատար անձին պաշտոնի նշանակելու կամ պաշտոնից ազատելու մասին տվյալներն (այսուհետ՝

հայտարարատու պաշտոնատար անձանց ռեեստր) օրենքով սահմանված կարգով և ժամկետում չի լրացրել և ծանուցել Հանձնաժողովին:

1.2 Հանձնաժողովը 2025 թվականի մայիսի 16-ին թիվ 01/2031/11-2025 գրությամբ, Կուսակցությանը ծանուցել է հայտարարատու պաշտոնատար անձանց ռեեստրը Կուսակցության յուրաքանչյուր հայտարարատու պաշտոնատար անձի պաշտոնի ստանձնելու կամ դադարեցնելու համար հիմք հանդիսացող համապատասխան ակտի պատճենի հետ միասին Հանձնաժողով ներկայացնելու վերաբերյալ:

Նույն գրությամբ Կուսակցության նախագահ Մովսես Շահվերդյանը ծանուցվել է, որ վերոնշյալ տեղեկությունները սահմանված ժամկետում չներկայացնելու դեպքում ծանուցումը ստանալուց հետո՝ 5-րդ աշխատանքային օրը՝ ժամը 16:00-ին, հրավիրվում է Հանձնաժողով՝ իր մասնակցությամբ Օրենսգրքի 189.10-րդ հոդվածով նախատեսված վարչական իրավախախտման հատկանիշներով արձանագրություն կազմելու համար, իսկ 10-րդ աշխատանքային օրը՝ ժամը 10:00-ին՝ առերևույթ իրավախախտման հիմքով կազմված արձանագրության և վերաբերելի նյութերի հիման վրա վարչական իրավախախտման վերաբերյալ գործի քննությանը մասնակցելու համար: Նշված ծանուցումը Մովսես Շահվերդյանի կողմից ստացվել է 2025 թվականի մայիսի 22-ին (հիմք՝ AL0127932384AM փոստային հետադարձ առաքանին), սակայն պահանջված տեղեկատվությունը սահմանված ժամկետում Հանձնաժողով չի ներկայացվել:

1.3 2025 թվականի հունիսի 3-ին պատշաճ ծանուցված Կուսակցության նախագահ Մովսես Շահվերդյանի բացակայությամբ կազմվել է թիվ 99/25 ՎԻՎ արձանագրությունը՝ Օրենսգրքի 189.10-րդ հոդվածով նախատեսված առերևույթ իրավախախտման հատկանիշներով:

1.4 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Մովսես Շահվերդյան բացակայությամբ 2025 թվականի հունիսի 6-ին՝ ժամը 10:00-ին, տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

Սույն վարույթի շրջանակներում վարույթի մասնակից Մովսես Շահվերդյանի կողմից 2025 թվականի հունիսի 2-ին Հանձնաժողով է ներկայացվել հետևյալ պարզաբանումը՝ «(...) Մեր կարծիքով կուսակցությունների մասին այս պահին գործող օրենքը թերի է, շատ դեպքերում՝ խրթին և վիճակահարույց, ուստի կարծում ենք՝ կարիք ունի լրամշակման և այս պահի խնդիրների և պայմաններին հարմարեցման և համապատասխանեցման: Մյուս կողմից տպավորություն է ստեղծվում, որ Ձեր ղեկավարած կառույցը նպատակ ունի խիստ հսկողության տակ վերցնել կուսակցությունների գործունեությունը, որը ժողովրդավարության նորմերի ակնհայտ խախտում է պաշտոնազանցություն և պարզապես անհարկի պահվածք:

Միաժամանակ Ձեզ տեղյակ ենք պահում, որ մեր կուսակցության ղեկավար մարմնում պետական պաշտոններ զբաղեցնող անձինք չկան, իսկ կուսակցության բոլոր անդամները իրենց հայտարարագրերը կներկայացնեն ՀՀ քաղաքացիների համար սահմանված կարգով:

Կարծում ենք միանգամայն անթույլատրելի է արհեստականորեն շեշտարկել ՀՀ քաղաքացիներին: Դա մենք՝ դիտարկում՝ ենք՝ որպես մարդու իրավունքների կոպտագույն խախտում:»:

III. Գործի քննության ընթացքում հաստատված հանգամանքները

Հանձնաժողովն ուսումնասիրել է թիվ ՎԻՎ/149/2025 վարչական վարույթում առկա նյութերը, կատարել հանգամանքների քննություն, որի արդյունքում հաստատված է համարում.

3.1 Արդարադատության նախարարության իրավաբանական անձանց պետական ռեգիստրի գործակալության էլեկտրոնային շտեմարանի տվյալների համաձայն՝ Մովսես Շահրամանյանը 2004 թվականի ապրիլի 15-ից հանդիսանում է Կուսակցության գործադիր մարմնի ղեկավարը՝ նախագահը, ինչով պայմանավորված միաժամանակ հանդիսանում է նաև «Կուսակցությունների մասին» սահմանադրական օրենքի 28.1-ին հոդվածի 4-րդ մասով

սահմանված՝ կուսակցության հայտարարատու պաշտոնատար անձանց ռեեստրը Հանձնաժողով ներկայացնելու պարտականություն կրող Օրենսգրքի 14-րդ հոդվածով սահմանված կուսակցության պաշտոնատար անձ:

3.2 Կուսակցության նախագահ Մովսես Շահվերդյանը Կուսակցության հայտարարատու պաշտոնատար անձանց ռեեստրը օրենքով սահմանված կարգով եռօրյա ժամկետում չի ներկայացրել Հանձնաժողով:

3.3 Մինչև վարչական իրավախախտման վերաբերյալ գործի քննության օրը Կուսակցության կողմից Հանձնաժողով չի ներկայացվել Կուսակցության հայտարարատու պաշտոնատար անձանց ռեեստրը:

IV. Որոշումն ընդունելու իրավական հիմքերը և հիմնավորումները.

4.1 «Կուսակցությունների մասին» սահմանադրական օրենքի 28.1-ին հոդվածի 1-ին մասի համաձայն՝ Կուսակցության մշտապես գործող ղեկավար մարմնի անդամները, իսկ այլ ղեկավար մարմինների դեպքում այդ մարմնի անդամները (այսուհետ նաև՝ հայտարարատու պաշտոնատար անձինք) պարտավոր են Կոռուպցիայի կանխարգելման հանձնաժողով ներկայացնել իրենց գույքի և եկամուտների հայտարարագիր, որի ձևանմուշը և հրապարակման ենթակա տեղեկությունների ցանկը սահմանում է Կոռուպցիայի կանխարգելման հանձնաժողովը:

4.2 «Կուսակցությունների մասին» սահմանադրական օրենքի 28.1-ին հոդվածի 2-րդ մասի համաձայն՝ Կուսակցության հայտարարատու պաշտոնատար անձինք ներկայացնում են պաշտոնը ստանձնելու, դադարեցնելու, ինչպես նաև տարեկան հայտարարագրեր:

4.3 «Կուսակցությունների մասին» սահմանադրական օրենքի 28.1-ին հոդվածի 4-րդ մասի համաձայն՝ Կուսակցությունն իր ղեկավար մարմնում հայտարարատու պաշտոնատար անձին պաշտոնի նշանակելու կամ պաշտոնից ազատելու մասին եռօրյա ժամկետում ծանուցում է Կոռուպցիայի կանխարգելման հանձնաժողովին՝ տրամադրելով համապատասխան ակտի պատճենը:

4.4 «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 3-րդ կետի համաձայն՝ Հանձնաժողովը վարում է հայտարարատու պաշտոնատար անձանց, այդ թվում՝ «Կուսակցությունների մասին» Հայաստանի Հանրապետության սահմանադրական օրենքով նախատեսված՝ կուսակցությունների ղեկավար մարմինների պաշտոնատար անձանց և հայտարարագրերի, ինչպես նաև հանրային պաշտոն զբաղեցնող անձանց և հանրային ծառայողների նվերների հաշվառման ռեեստրները:

Նույն օրենքի 23-րդ հոդվածի 1-ին մասի 2-րդ կետի համաձայն՝ Հանձնաժողովի գործառույթն է հայտարարագրման գործընթացը կանոնակարգելը, հայտարարագրերը ստուգելն ու վերլուծելը:

«Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.5 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.6 Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ: Սույն օրենսգրքի իմաստով՝ կուսակցության պաշտոնատար անձ է համարվում կուսակցության կանոնադրության կամ այլ

փաստաթղթերի հիմքով՝ սույն օրենսգրքով պատասխանատվություն առաջացնող գործողությունների (անգործության) համար պատասխանատու կուսակցության ղեկավար մարմնի անդամը կամ կուսակցության՝ կազմակերպական-տնօրինչական, վարչատնտեսական գործառույթներ իրականացնող պատասխանատու անդամը կամ աշխատողը:

4.7 «Վարչարարության հիմունքների և վարչական վարույթի մասին» օրենքի 29.1-ին հոդվածի 3-րդ մասի համաձայն՝ Վարչական վարույթի ընթացքում ծանուցումներն ուղարկվում են փոստային առաքմամբ կամ հանձնվում են առձեռն, իսկ սույն հոդվածով նախատեսված դեպքերում ուղարկվում են էլեկտրոնային փոստի հասցեով կամ հաղորդակցության այլ միջոցներով:

Նույն հոդվածի 9-րդ մասի համաձայն՝ Ծանուցումները փոստային առաքմամբ ուղարկվելու դեպքում վարչական վարույթին կցվում է հասցեատիրոջն ուղարկվելու մասին ապացույցը, իսկ պատվիրված նամակով ուղարկվելու դեպքում՝ նաև հասցեատիրոջ կողմից ստացման վերաբերյալ ապացույցը:

4.8 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.9 Օրենսգրքի 252-րդ հոդվածի համաձայն՝ մարմինը ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.10 Օրենսգրքի 244.22-րդ հոդվածի համաձայն՝ Օրենսգրքի 189.10 -րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում պետական մարմինը կամ պաշտոնատար անձը, որին համապատասխան տեղեկությունը (տվյալը) պետք է տրամադրվի:

4.11 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

4.12 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին: Գործի վարույթը կարճելու մասին որոշում ընդունվում է նաև բանավոր դիտողություն հայտարարելու դեպքում:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենսգրքի 189.10-րդ հոդվածով նախատեսված դրույթը՝ նպատակ է հետապնդում ապահովել կուսակցության ղեկավար մարմնում հայտարարատու պաշտոնատար անձի հաշվետվողականությունը, կոռուպցիոն ռիսկերից և շահերի բախումից զերծ գործունեությունը:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Անդրադառնալով օրենսդրի կողմից նախանշված՝ հայտարարատու պաշտոնատար անձի հաշվետվողականության ապահովման, ինչպես նաև կոռուպցիոն ռիսկերից և շահերի բախումից զերծ գործունեության ապահովման նպատակին, Հանձնաժողովն արձանագրում է, որ սույն դեպքում հաստատված փաստ է այն, որ ինչպես օրենսդրությամբ սահմանված ժամկետներում, այնպես էլ մինչև վարչական իրավախախտման վերաբերյալ գործի քննության ավարտը վարույթի մասնակցի կողմից Կուսակցության հայտարարատու

պաշտոնատար անձանց ռեեստրը օրենքով սահմանված կարգով եռօրյա ժամկետում Հանձնաժողովին չի ներկայացվել, ուստի չի ապահովվել Կուսակցության ղեկավար մարմնում հայտարարատու պաշտոնատար անձի հաշվետվողականության օրենսդրի նպատակը:

Միաժամանակ, նշվածով պայմանավորված, չի ապահովվել նաև օրենսդրի կողմից նախանշված՝ Կուսակցության կողմից կոռուպցիոն ռիսկերից և շահերի բախումից զերծ գործունեության վերահսկողության նպատակը, քանի որ, ըստ էության, Կուսակցության հայտարարատու պաշտոնատար անձանց ռեեստրի բացակայության պայմաններում չի ապահովվում Կուսակցության մշտապես գործող ղեկավար մարմնի անդամների կողմից պաշտոնը ստանձնելու, դադարեցնելու, ինչպես նաև տարեկան հայտարարագրերը ներկայացնելու նկատմամբ վերահսկողության ապահովումը, ինչպես նաև Հանձնաժողովի կողմից այդ անձանց համար օրենքով պահանջվող հայտարարագրերը ներկայացնելու գործընթացն ապահովելը, քանի որ այդ տվյալների՝ Հանձնաժողով ներկայացնելու ուժով են դրանք մուտքագրվում հայտարարագրման էլեկտրոնային համակարգ և ստեղծվում համապատասխան հայտարարագրերը:

Անդրադառնալով Մովսես Շահվերդյանի պարզաբանմանը՝ Հանձնաժողովը արձանագրում է, որ Սահմանադրական օրենքի 28.1-ին հոդվածի 1-ին մասի համաձայն՝ Կուսակցության մշտապես գործող ղեկավար մարմնի անդամները, իսկ այլ ղեկավար մարմինների դեպքում այդ մարմնի անդամները (այսուհետ նաև՝ հայտարարատու պաշտոնատար անձինք) պարտավոր են Կոռուպցիայի կանխարգելման հանձնաժողով ներկայացնել իրենց գույքի և եկամուտների հայտարարագիր, որի ձևանմուշը և հրապարակման ենթակա տեղեկությունների ցանկը սահմանում է Կոռուպցիայի կանխարգելման հանձնաժողովը: Սահմանադրական օրենքի նույն հոդվածի 2-րդ մասի համաձայն՝ Կուսակցության հայտարարատու պաշտոնատար անձինք ներկայացնում են պաշտոնը ստանձնելու, դադարեցնելու, ինչպես նաև տարեկան հայտարարագրեր: Միաժամանակ, «Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 3-րդ կետի համաձայն՝ Հանձնաժողովը վարում է հայտարարատու պաշտոնատար անձանց, այդ թվում՝ «Կուսակցությունների մասին» Հայաստանի

Հանրապետության սահմանադրական օրենքով նախատեսված՝ կուսակցությունների ղեկավար մարմինների պաշտոնատար անձանց և հայտարարագրերի, (...)ռեեստրները: Նշվածից հետևում է, որ Կուսակցության հայտարարատու պաշտոնատար անձանց ռեեստրը Հանձնաժողով ներկայացնելը օրենքի պահանջ է, հետևաբար վարույթի մասնակցի կողմից ներկայացված դիրքորոշումը, համաձայն որի՝ Հանձնաժողովը նպատակ ունի խիստ հսկողության տակ վերցնել կուսակցությունների գործունեությունը, որը ժողովրդավարության նորմերի ակնհայտ խախտում է պաշտոնազանցություն և պարզապես անհարկի պահվածք, ինչպես նաև կուսակցության ղեկավար մարմնում պետական պաշտոններ զբաղեցնող անձինք չկան, իսկ կուսակցության բոլոր անդամները իրենց հայտարարագրերը կներկայացնեն ՀՀ քաղաքացիների համար սահմանված կարգով անհիմն է հետևյալ պատճառաբանությամբ.

Վարույթի մասնակցի կողմից Հանձնաժողով ներկայացված դիրքորոշման առնչությամբ Հանձնաժողովը հարկ է համարում արձանագրել, որ դիրքորոշման մեջ ներկայացվել է տեսակետը, որը հանգում է կուսակցության ղեկավար մարմնի անդամների՝ պաշտոնատար անձ չհանդիսանալու, հետևաբար, գույքի և եկամուտների հայտարարագիր ներկայացնելու պարտականություն չունենալուն: Միևնույն ժամանակ վարույթի մասնակցի ներկայացրած դիրքորոշումից պարզ է դառնում, որ վերջինս հայտարարագրի ներկայացման պարտականությունն ընկալում է համընդհանուր հայտարարագրման շրջանակներում, որը վերաբերում է ՀՀ պետական եկամուտների կոմիտեին ներկայացվող հայտարարագրերին:

Սակայն «Կուսակցությունների մասին» սահմանադրական օրենքի, ինչպես նաև «Հանրային ծառայության մասին» օրենքի դրույթներից անմիջականորեն բխում է, որ Օրենսդիրը կուսակցությունների մշտապես գործող ղեկավար մարմնի անդամներին դիտում է որպես կուսակցության պաշտոնատար անձանց և նրանց համար սահմանել է պարտականություն՝ Հանձնաժողով ներկայացնել իրենց գույքի և եկամուտների հայտարարագրերը, ընդ որում, նկատի ունենալով կուսակցությունների հատուկ կարգավիճակը, միաժամանակ սահմանել է որոշակի առանձնահատկություններ՝ ի տարբերություն «Հանրային ծառայության մասին» օրենքի իմաստով հայտարարատու

պաշտոնատար անձանց: Ամփոփելով, Հանձնաժողովն արձանագրում է, որ կուսակցության ղեկավար մարմնի անդամները համարվում են պաշտոնատար անձինք «Կուսակցությունների մասին» սահմանադրական օրենքի իմաստով և նրանց նկատմամբ տարածվում է գույքի, եկամուտների հայտարարագրի ներկայացման պարտականությունը:

Հետևաբար, վարույթի մասնակցի ներկայացրած մեկնաբանությունը չի բխում գործող օրենսդրությունից և օրենքով սահմանված կարգով կուսակցության ղեկավար մարմնում պետական պաշտոն զբաղեցնող անձանց բացակայությունը որևէ կերպ չի ազատում այդ մարմնի անդամներին օրենքով նախատեսված պարտականություններից: Միաժամանակ դա հիմք չի կարող հանդիսանալ, որ կուսակցությունը հրաժարվի բացահայտել իր ղեկավար կազմը, որն անհրաժեշտ նախապայման է Հանձնաժողովի՝ հայտարարագրման գործընթացի կանոնակարգման գործառույթի պատշաճ իրականացման համար:

Ամփոփելով ամբողջ վերոնշյալը՝ Հանձնաժողովն արձանագրում է, որ «Հայաստանի Աշխատավորական Սոցիալիստական» կուսակցության նախագահ Մովսես Շահվերդյանի կողմից թույլ է տրվել Օրենսգրքի 189.10-րդ հոդվածի խախտում, այն է՝ Պետական մարմնին (պաշտոնատար անձին) իր օրինական գործունեության համար անհրաժեշտ օրենքով նախատեսված տեղեկությունը՝ Կուսակցության հայտարարատու պաշտոնատար անձանց ռեեստրը, սահմանված ժամկետում չի տրամադրվել Հանձնաժողովին:

Օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ:

Արդարադատության նախարարության իրավաբանական անձանց պետական ռեգիստրի գործակալության էլեկտրոնային շտեմարանի տվյալների համաձայն՝ Մովսես Շահվերդյանը 2004 թվականի ապրիլի 15-ից հանդիսանում է Կուսակցության գործադիր մարմնի ղեկավարը՝ նախագահը, ինչով պայմանավորված միաժամանակ հանդիսանում է նաև 28.1-ին հոդվածի 4-րդ մասի համաձայն Հանձնաժողով կուսակցության

հայտարարատու պաշտոնատար անձանց ռեեստր ներկայացնելու պարտականություն կրող պաշտոնատար անձ:

Հաշվի առնելով վերոնշյալը՝ Մովսես Շահվերդյանը՝ որպես Օրենսգրքի 14-րդ հոդվածով նախատեսված կուսակցության պաշտոնատար անձ, ենթակա է պատասխանատվության Օրենսգրքի 189.10-րդ հոդվածով սահմանված արարքի համար:

Օրենսգրքի 189.10-րդ հոդվածով սահմանված արարքի համար նախատեսված է վարչական պատասխանատվության՝ տուգանքի նշանակում՝ սահմանված նվազագույն աշխատավարձի հարյուրապատիկի չափով:

Հիմք ընդունելով ամբողջ վերոգրյալը և ղեկավարվելով «Կոռուպցիայի կանխարգելման հանձնաժողովի մասին» ՀՀ օրենքի 24-րդ հոդվածի 1-ին մասի 3-րդ կետով, 26-րդ հոդվածով, Օրենսգրքի 189.10-րդ հոդվածով՝ Հանձնաժողովը.

Ո Ր Ո Շ Ե Ց

1. Կուսակցության նախագահ Մովսես Շահվերդյանի նկատմամբ կիրառել վարչական տույժ սահմանված նվազագույն աշխատավարձի հարյուրապատիկի՝ **100,000 (մեկ հարյուր հազար) ՀՀ դրամի չափով:**

2. Տուգանքը պետք է վճարվ գանձապետական **900005001335** «Իրավախախտումների համար կիրառվող վարչական տուգանքներ և պատժամիջոցներ» **հաշվեհամարին՝** վճարման անդորրագրի «նպատակ» դաշտում պարտադիր նշելով սույն որոշման համարը:

3. Սույն որոշումն ուժի մեջ է մտնում Մովսես Շահվերդյանին այն սահմանված կարգով հանձնելու (հանձնված համարվելու) հաջորդող օրվանից:

4. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՏՅԱՆ